

欽
定
全
唐
文

欽定全唐文卷二十六目錄

新文藝出版社藏書

元宗 七

禁屠殺雞犬詔

誠勵宗室詔

禁州縣嚴酷詔

緩修大明宮詔

命諸州舉賢才詔

復薛崇簡官爵詔

賜乳母竇氏俸料準三品詔

宣示亳州瑞木詔

答崔日用手詔

答張說進白鳥賦詔

祈雨詔

禁濫借魚袋詔

貶韋安石等詔

停諸陵供奉鷹狗詔

停鶯鴨坊米粟詔

令舉實才詔

量減員外官詔

放還諸蕃宿衛子弟詔

飭尚書諸司詔

敘錄薛訥等征吐蕃功詔

禁坊市鑄佛寫經詔

禁用珠玉錦繡詔

褒楚國公姜皎詔

出官人詔

宴勞勇士詔

免崔滌從坐詔

賜高年几杖詔

收瘞吐蕃戰死人詔

追賜蘇瓌實封詔

練兵詔

幸鳳泉湯詔

宣慰突厥降戶詔

賑河南河北詔

再賑河南河北詔

禁私役兵士詔

清釐滯獄詔

賜北庭都護郭虔瓘手詔

禁創造寺觀詔

命薛訥等討吐蕃詔

欽定全唐文卷二十六

元宗七

禁屠殺雞犬詔

犬以守禦雞以司晨有用於人不同常畜好生之德徧宜
令及自今並不得屠殺

誠勵宗室詔

朕奉天明命虔受睿圖而皇室子弟未能稱職堂姪餘慶
承煦紹宗行淹祚洽再從弟璵志謙等不能謹身奉法而
乃輕侮國章擯斥邊隅未爲塞責朕憫其愚昧屈法申恩

並追赴京令於國子監安置讀書如悔過自新克復先訓
所司條奏當議其官皇宗親更有左貶嶺南邊遠州非惡
逆緣坐等色亦宜準此其有見任別駕年齒尚幼未堪理
百姓者宜委中書門下及新興郡王晉李思訓等簡擇追
赴京其祿俸一事已上並委本州勾當每季附送入京給
付其餘慶等本州祿亦準此宗親中有才行灼然爲衆推
挹者按察使具名以聞朕當擢以不次自今後有犯贓私
違禮經者準法科處刑茲無捨庶敦睦之情必聞於九族
自家刑國允洽於羣心宜各勉勵以識朕意

禁州縣嚴酷詔

法憲之設期於無私本以救人蓋非獲已故得情存於勿
喜折獄貴於哀矜至如斷決諸罪皆著科條若守而不失
自爲良吏如聞近日州縣罕習章程率情嚴酷或致殞殂
假令事應重辟固當明啟刑書豈可輒因夏楚輕絕人命
太上皇仁覃萬寓澤被羣生子愛黎甿慎恤刑罰予恭承
天訓虔奉睿圖肝食載勤納隍兢慮凡厥長吏宜達此懷
務遵法式勿仍前弊如或有違當寘嚴法宣示黔庶咸使

聞知

金史卷之二十一
二二
二
緩修大明宮詔

卑宮致美愛人之力靈臺罷營重費之廣景彼前列吾無
間然頃以所居殿院素非宏敞時方暑雨頗有蒸鬱上稟
聖慈式遵時令將修別寢順彼高居雖復庀徒所須止於
蕃匠補葺所擬無煩外力然以麥秋爰及農務方勤維夏
在辰執役爲弊營之則衆物有勞而一身逸罷之則我躬
未泰而萌庶安夫生人樹君將利之也勞人自奉予所不
爲其修大明宮宜即待閒月方使畢功宣示具寮使知予
意所有先役工匠即優還價值勿令懸欠仍即放散

命諸州舉賢才詔

致化之道必於求賢得人之要在於徵實頃雖屢存賁帛
無輟翹車而駿骨空珍真龍罕覲豈才之難遇將舉或未
精且人匪易知取不求備瑰琦失於俗譽韜晦嘆於後時
宜其博詢州里明敷幽側使管庫無遺邁軸咸舉其諸州
有抱器懷才不求聞達者命所在長官訪名奏聞武勇者
具言謀畧文學者指陳藝業務求實用以副予懷

復薛崇簡官爵詔

太平公主子薛崇簡執心奉國勵節忘私早辯忠邪每有

規諫因被嫌嫉加以鞭笞事不見從忠實可紀宜甄逆順復其官爵仍賜姓李

賜乳母竇氏俸料準三品詔

燕國夫人竇氏慈慧和順掌執禮經女憲母師獨高柔則朕在孩幼躬勞乳養遠惟恩義寧忘夙昔瞻既往而莫追見如存而永慕撫渭城之事未足爲言視南陽之書益增其感俾錫朝寵微申朕懷俸料祿課等一準職事三品給
宣示亳州瑞木詔

瑞木表靈奇文自現用彰大慶以福洪圖配五德於易經

迎萬葉於休運宣誠告謝仍付史官其檜片藏於內庫兼
賜諸王宰輔及道衆

答崔日用手詔

夫詩者動天地感鬼神厚於人美於教矣朕志之所尚思
與之齊庶乎採詩之官補朕之闕且古者封禪升中告成
朕以菲德未明於至道竦然以聽頗壯相如之詞惕然載
懷復慙夷吾之語卿洽聞殫見溫故知新建此發揮益彰
忠懇豈非討蓬山之籍心不忘於起予因蘭殿之祥言固
深於啟沃朕循環覽諷用慰於懷今賜卿衣裳一副物五

十段以示無言不酬之信也

答張說進白鳥賦詔

得所進白鳥符彩明媚助日揚輝白羽翩翩凌霜比色況
乎反哺斯重能仁是高對之有觀情不能已又覽所進放
言體物詞藻瀏亮尋繹研味披翫無厭所謂文苑菁華詞
場警策也今賞卿金五挺銀十挺

祈雨詔

朕聞諸易曰先天而天不違後天而奉天時天且弗違況
於人乎因斯而言則君事於天養於人行月令順時物也

朕以不德恭膺斯運靜言詢政每用憂勞屬獻歲發春東風解凍土膏脉散草樹自樂而天久不雨元元何辜孰可以授農事拯彼饑者豈布德利施慶惠尚不及歟豈掩骼埋胔無靡無卵尚不及歟豈名山大川修祭命祀尚不及歟欽若令典惟增所懼緬懷大猷思補其闕有司可稽春令以稱朕心其有直諫昌言宏益政理者朕將親覽罔或隱避不急之務一切停息見禁囚徒速令處置宜從寬大勿使稱冤本州本軍刺史軍將境內所有名山大川能興雲致雨者並宜祈祭其有僵屍暴骸無主收斂者亦仰埋

金匱要略卷之二十一
五
掩量致祭訖各具狀奏聞應須酒脯宜用官物古者雪冤
婦於東海問刑人於北寺則以旱之故應時如響至於山
不童澤不竭使霈然以降輿而致之復何遠也將達精誠
務修蠲潔俾幽坎遂性飛走從宜則冀天之愛人月離于
畢禺禺之望感而遂通布告遐邇令知此意

禁濫借魚袋詔

章服所施貴賤攸別苟容僭越未爲獎勸承前諸軍人多
有借緋及魚袋者軍中卑品此色甚多無功賞借深非道
理宜勅諸軍鎮但是從京借魚袋及無灼然功軍中權借

者並委州軍長官勅到並即收取待立功日據功合得即將已上者委軍將先借後奏其靈武和戎大武幽州鎮軍赤水河源瀚海安西定遠等軍即臨賊衝事藉懸賞量軍大小各封賞金魚袋五十枚並委軍將臨時行賞

貶韋安石等詔

青州刺史韋安石太子賓客韋嗣立刑部尚書趙彥昭等往在先朝曲蒙厚賞因緣幸會久在廟堂朋黨比周聞於行路景龍之末長蛇縱禍倉卒之間人神憤怒未聞捨生取義直道昌言遂削太上皇輔政之辭用韋氏臨朝之策

比常隱忍復以崇班將期愧畏稍懲前惡而尚款回邪苟
安榮寵宜從謫官之典以勵事君之節安石可沔州別駕
嗣立可岳州別駕彥昭可袁州別駕並員外置

停諸陵供奉鷹狗詔

園陵之地衣冠所遊凡厥有司罔不祗事禮存則先王是
訓禮失則後代何觀欽若永圖敢忘舊典頃者別致鷹狗
供奉山陵至於料度極多費損況昔誠禽荒旣非尋常所
用遠惟龍馭每以仁愛爲心彼耕象與耘鳥且增哀慕豈
飛蒼而走黃更備畋獵有乖儀式無益崇嚴載懷虧紊良

深悚惕諸陵所有供奉鷹狗等並宜即停

停鷺鴨坊米粟詔

朕聞鷺鴨坊比供米粟恨不早知久令虛費今百姓饑阻
未能周給烏享人食是何理焉其料宜即停并雞坊亦準
此

令舉實才詔

古之學士始入小學見小節入大學見大節知父子長幼
之序君臣上下之位然後師逸功倍化人成俗莫不由之
子不云乎遠而有光者飾也近而逾明者學也故道行於

上祿在其中所謂貴於速成不唯於遲達自頃州里所薦
公卿之緒門人衆矣孰嗣子音國冑昂然未臻吾道至使
鑽仰之地寂寥厥風貴於責實務於求仕將去聖滋遠尚
泔澆薄爲敦儒未宏不行勸沮朕承百王之末居四海之
尊惟懷永圖思革前弊何以發後生之智慮垂先王之法
則朕甚懼之敢忘於是天下有業擅專門學優重席堪師
授者所在具以名聞自今以後貢舉人等宜加勗勉須獲
實才如有義疏未詳習讀未遍輒充舉送以希僥倖所由
官並寘彝憲有司更申明條例稱朕意焉

量減員外官詔

今歲諸州多非善軌及京師每勞轉運員外等官人數倍
廣俸祿之輩何以克周諸色員外試檢校官除皇親諸親
及五品以上並戰陣要籍內侍省以外一切總停至冬放
選量狀迹書判與正員外官其未經考者先與處分仍不
拘選格聽集自今以後除戰功以外非別勅不得輒注擬
員外等官

放還諸蕃宿衛子弟詔

我國家統一寰宇歷年滋多九夷同文四隩來暨夫其襲

冠帶奉正朔禹禹然嚮風而慕化列於天朝編於屬國者
蓋亦衆矣我則潤之以時雨炤之以春陽淳德以柔之中
孚以信之元風既同羣物茲遂莫不自天壤窮海域厥角
以請吏執贄以來庭皇唐之德於此爲盛今外蕃侍子久
在京國雖威畏之及自遠畢歸而羈旅之志重遷斯在宜
命所司勘會諸蕃充質宿衛子弟等量放還國契丹及奚
延通質子並即停追前令還蕃首領等至幽州且住交替
者即旋去朕欲以鳥獸咸若華戎俱泰來則納其朝謁之
禮去則隨其生育之心推我至誠崇彼大順含宏之施德

莫厚焉

飭尚書諸司詔

尚書禮閣國之政本郎官之選實藉良才如聞諸司郎中
員外郎怠於理煩業唯養望凡厥案牘每多停擁容縱典
吏仍有貨賂欲使四方何以取則事資先令義貴能改宜
令當司官長懇勸示諭并委左右丞勾當其有與奪不當
及稽滯稍多者各以狀聞

敕錄薛訥等征吐蕃功詔

吐蕃小寇僻處大荒先朝外撫許其內屬結以和戎之好

優以外臣之禮野心易動朝獎過忘不度德以量力敢窺邊而犯塞薛訥等擁旌爲將按節持兵驅之逐之指期殄滅使芑桑莫繫破竹無遺實賴宗廟之靈兼資將士之力比來酬敘多厯歲年命賞逾時有乖勸善已令紫微舍人倪若水就軍敘錄卽有處分

禁坊市鑄佛寫經詔

佛教者在於清淨存乎利益今兩京城內寺宇相望凡欲歸依足申禮敬下人淺近不悟精微覩菜希金逐燄思水浸以流蕩頗成蠹弊如聞坊巷之內開鋪寫經公然鑄佛

口食酒肉手漫羶腥尊敬之道既虧慢狎之心斯起百姓等或緣求福因致饑寒言念愚蒙深用嗟悼殊不知佛非在外法本居心近取諸身道則不遠溺於積習實藉申明自今已後禁坊市等不得輒更鑄佛寫經爲業須瞻仰尊容者任就寺拜禮須經典讀誦者勤於寺取讀如經本少僧爲寫供諸州寺觀並準此

禁用珠玉錦繡詔

雕文刻鏤衣紈履絲習俗相誇殊塗競爽傷風敗俗爲弊良久珠玉錦繡槩令禁斷準式三品以上飾以玉四品以

上飾以金五品以上飾以銀者宜於腰帶及御盞酒杯杓
依式自外悉鑄爲鋌婦人衣服各隨其夫子其已有錦繡
衣服聽染爲阜成段者官爲市取天下更不得採取珠玉
刻鏤器玩造作錦繡珠繩織成帖緇二色綾綺羅作龍鳳
禽獸等異文字及堅攔錦文者決杖一百受雇工匠降一
等科之兩京及諸州舊有官織錦坊悉停

襄楚國公姜皎詔

朕聞士之生代始於事親中於事君終於立身此其本也
若乃移孝成忠策名委質命有泰山之重義徇則爲輕草

有疾風之力節全則知勁況君臣之相遇而故舊之不遺乎銀青光祿大夫殿中監楚國公姜皎簪紱聯華珪璋特秀寬厚爲量體靜而安仁精微用心理和而專直往居藩邸潛款風雲亦由彭祖之同書子陵之共學朕常遊幸於外至長楊鄠社之間皎於此時與之累宿私謂朕曰太上皇即登九五王必爲儲副凡如此者數四朕叱而後止寧知非僕雖玩於鄧晨可收護軍遂訶於朱祐皎復言於朕兄弟及諸駙馬等因聞徹太上皇太上皇遽奏於中宗孝和皇帝尋遣嗣虢王邕等鞠問皎保護無怠辭意轉堅李

通之讖記不言田叔之髡鉗罔憚乃爲宗楚客紀處訥等密奏譎皎炎荒中宗特降恩私左遷潤州長史讒邪每構忠懇逾深戴於朕躬憂存王室以爲天且有命豫睹成龍之徵人而無禮常懷逐鳥之志游辭枉陷旋罹貶斥嚴憲將及殆見誅夷履危本於初心遭險期於不貳雖禍福之際昭然可圖而艱難之中是所繫賴洎朕祗膺寶位又共翦姦臣拜以寵光不忘撝挹敬愛之極神明所知造膝則曾莫詭隨匪躬則動多規諫補朕之闕斯人孔臧而悠悠之談嗷嗷妄作醜正惡直竊生於謗考言詢事益亮其誠

昔漢昭帝之保霍光魏太祖之明程昱朕之不德庶幾於此矧夫否當其悔則滅宗毀族朕負之必深泰至其亨則如山如河朕酬之未補豈流言之足聽而厚德之遂忘謀始有之圖終可也宜告示中外咸令知悉

出宮人詔

古者三夫人九嬪二十七世婦八十一御女以備內職焉朕恭膺大寶頗修舊號而六宮曠位未副於周禮八月算人不行於漢法至於姜后進諫永巷脫簪袁絲有言上林引席此則朕之所慕未曾忘也頃者人頗誼嘩聞於道路

以爲朕求聲色選備掖庭豈予志之未孚何斯言之妄作
往緣太平公主輒進入宮朕以事須順從未能拒抑見
不賢莫若內省欲止謗莫若自修改而更張損之可也妃
嬪以下朕當簡擇使還其家宜令所司將車牛今月十二
日赴崇明門待進止

宴勞勇士詔

朕光宅四海撫御百蠻屬疆場未寧軍國多費每欲指揮
方略親率軍師故召募爾等擬從朕行知爾等材力冠羣
藝能拔萃但以不教人戰豈知金鼓之聲授以兵律方辨

干戈之勢所以且遣薛訥等於隴右防禦使令教習爾等
既練韜鈴須明隊伍使投石拔劍以勵威鋒裹糧坐甲待
清逋寇若能因機立效遇敵邀勲酬以官榮必超格例然
後陪朕輿駕從戎塞垣俾爾先驅敬聽後命今宴勞爾等
并賜錢三千貫可節級領取即宜好去

免崔滌從坐詔

明王垂訓則罪不相及善人懼罰則刑不可濫由是母嘗
有言豈坐趙括魚旣從戮寧遺叔向古之道也朕所務焉
衛尉少卿崔滌竭誠奉國忘軀事君曾同下杜之遊頗寄

中陽之舊誠表於先覺節全於後凋其兄湜素蓄異圖交結兇黨滌雖懷在原之急深憂闔室之刑動靜則聞始終必盡爲臣無隱惟滌有之言念厥功曷云從坐況老父就殞諸兄繼歿搖落變衰有聞矜憫賞罰勸懲宜判忠邪滌家除兄湜一房外餘並不須爲累

賜高年几杖詔

古之爲政先於尚老居則致養禮傳三代行則就見制問百年蓋皇王之勸人教黎庶之爲子朕寅奉休厯祇膺聖謨因秋歸而歲成屬星見於郊祀念其將至尤重乞言俾

伸恩於几杖期布惠於鄉國九十以上宜賜几杖八十以上宜賜鳩杖所司準式天下諸州侍老宜令州縣逐穩便設酒食一準京城賜几杖其婦人則送几杖於其家

收瘞吐蕃戰没人詔

乞力徐等天迷神怒背義忘恩憫其下人制在凶帥積骸暴露潤草塗原言念於茲豈忘惻隱其吐蕃戰死人等宜令所在州縣速與瘞埋俾有申於弔拯庶無隔於華裔

追賜蘇瓌實封詔

疇庸賞善百王攸先追遠飾終千載同德故尚書左丞相

太子少傅贈司空荊州大都督許國文貞公瓌履正體道
外方內直悉心奉上卑身率禮協贊帷幄三朝有鹽梅之
任變諧台袞九命爲社稷之臣先朝晏駕覺起官掖國擅
稱制之姦人懷綴旒之懼兇威孔熾宗祀幾傾顧命遺恩
太皇輔政逆臣刊削韋氏臨朝遂能首發昌言侃然正色
列諸視聽暴於朝野松檟已遠風烈猶存緬懷誠節良深
耿歎可賜實封一百戶

練兵詔

比來緣邊鎮軍每年更代兵不識將將不識兵豈惟緣路

疲人蓋是以卒與敵其以西北軍鎮宜加兵數先以側近
兵人充並精加簡擇其有勞考等色所司具以條例奏聞
戰兵別簡爲隊伍專令教練不得輒有使役仍令兵部侍
郎裴灌大常少卿姜皎往軍州計會便簡支配有見集後
軍兵宜令兵部侍郎韋抗紫微舍人王珽即簡擇以聞

幸鳳泉湯詔

陳詩展義問俗觀風乃王者之所務也頃屬農事皆隙歲
功有成近歷鄴鎬左連岐雍見江山秀麗溝塍綺錯長揚
鄴杜之間竹林園果之富相望於道家給人足謂之時邁

頗慰予懷思所以問耆老恤淹滯舉逸人旌賢士庶協巡遊之典以符行在之恩駕所過之縣見禁囚徒以下咸宜放免流以上罪具犯狀奏聽進止古者親問百年存養耆老年九十以上并篤疾各賜物四段綿布各一束

宣慰突厥降戶詔

北戎爲患南牧是膺叛而伐之服而捨之春秋格言是謂通典葛邏祿陰山都督部落驕天縱毒候月爲妖桀驚之心久矣脅從之禍深矣而冒其攜阻思我恩化來七旬而就格逾萬里而歸誠稽顙邊陲披肝塞下宜令左散騎常

侍解琬攝御史大夫持節往北庭宣慰突厥部落緣邊降戶要在便宜處分

賑河南河北詔

君以人爲本人以食爲天雖水旱蟲螟代則常有有一於此胡寧不恤間者河北河南災蝗水澇之處聞其困弊未獲安存念之憮然不忘寤寐宜令禮部尚書鄭惟忠持節河南道宣撫百姓工部尚書劉知柔持節河北道安撫百姓其被蝗水之州量事賑貸務安其俗稱朕意焉

再賑河南河北詔

河南河北去年不熟今歲亢旱全無麥苗雖令賑給未能周贍所在饑弊特異尋常如聞至今猶未得兩事須存問以慰其心從此發使又恐勞擾宜降恩制令本道按察使安撫其有不收麥處更量賑恤使及秋收仍令勸課種黍稌及旱穀等使得接糧應有事急要者宜委使人量停事有不便於人須有釐革者準此

禁私役兵士詔

古者名將在乎養兵故疾則吮癰渴不先飲撫循慰藉恩義感激所以奮不顧身戰無完陣如聞諸將總管已下不

遵師律多役兵士帳中厭梁肉之娛麾下罹勤瘁之色人
既勞力軍亦挫氣豈孫吳養士之方韜鈴用兵之法春秋
責帥典憲斯在自今已後總管以下私使兵士計庸以受
所監臨財物論頒下諸軍咸使知悉

清釐滯獄詔

無知之徒自罹刑憲一遭縲綬坐變星瓘長吏依違不時
疏決過成滯獄豈曰當官況三陽在辰德澤思布一物失
所勤恤是殷惟懷永圖俾申幽枉其所在見禁囚未斷決
者令所在長官親加按理仍令御史及按察使訪察隨事

糾繩

賜北庭都護郭虔瓘手詔

默啜殘凶，倔強邊徼，吐蕃小醜，孤負聖恩。我國家豫在懷柔，未遑弔伐，而乃敢肆蜂蠆，屢犯疆陲。虔瓘心蘊六奇，折衝千里，追奔邁於三搜，受降逾於萬計。建功若此，朕實嘉之。

禁創造寺觀詔

天下寺觀屋宇，先成自今已後，更不得創造。若有破壞事，須條理任經所繇，陳牒簡驗，然後聽許。

命薛訥等討吐蕃詔

命彼太師聞乎周頌安得猛士欽若漢圖朕懷柔百蠻茂
育萬姓綏之則教人息戰靖之則去兵不用故獯戎是逐
前史嘗載夷狄爲亂先王必征所以罰其浸驕徵其即敘
朔方軍壘接太原之備胡右地城池控張掖之遮虜是用
誠於師旅揚我兵威誰其任之肅此將命右羽林軍大將
軍上柱國河東郡開國公薛訥左衛大將軍上柱國太原
郡開國公郭虔瓘等旣明且哲緯武經文登壇有大將之
容辭第有忠臣之志或斬其愛子掃塵而清北風或俘其

名王却地而盡西海故可以率如羆之勇當非熊之寄然則井陘之間昔不成列河源之路舊多鑿空設險而張遠謀總戎而獻長策俾爾之效在于斯舉固當殲其種落告成于王豈爲完我甲兵逸而待寇而已訥可持節充涼州鎮軍大總管赤水建康河源及緣邊州軍並受節度仍與郭虔瓘張知運杜賓客相知共爲表裏夙設方畧虔瓘可持節充朔州鎮大總管和戎大武及并州以北緣邊州軍並受節度仍與張知運甄道一相知共爲犄角勿失權宜訥便特於涼州住涼州都督楊執一爲副大總管虔瓘於

并州住并州長史王峻爲副大總管宜排比兵馬精加教
練幽州有事即令虔瓘將和戎兵馬從常山土門與甄道
一計會共討凶逆其同華等兵及精騎健兒并鞍馬等依
三月十五日制仍令遠探量事續遣

欽定全唐文卷二十七目錄

元宗 八

減膳省刑詔

命宰臣省察囚徒詔

整飭吏治詔

緩征詔

求言詔

降大理繫囚罪詔

征越薦詔

命李全確往淮南授捕虎法詔

誅長孫昕等詔

禁僭用服色詔

更定滿考日例詔

答倪若水詔

捕蝗詔

令御史檢察差科詔

勸獎縣令詔

賜盧懷慎家帛粟詔

更定兩畿縣令考滿詔

簡察驛路妄索供給詔

命柳城復置營州詔

遣使巡察河南北詔

徵隱士盧鴻一詔

戒諭吏部員外郎褚璆等詔

量減鎮兵年限詔

封永樂縣主出降松漠郡王詔

改明堂爲乾元殿詔

安置降蕃詔

令奏事仍進先狀詔

優禮諸州鄉貢明經進士詔

命越王貞從孫琳嗣爵詔

令禮官條奏應行事詔

定致仕官俸詔

整飭民風詔

禁屠殺馬牛驢詔

令詳定宗廟社稷嶽瀆祭典詔

放遣括獲婦女詔

賜京官等俘獲吐蕃牛馬詔

順時決獄詔

禁策判不切事宜詔

久任二千石詔

授潘好禮邠王府長史詔

授盧鴻一諫議大夫詔

賑恤河南北詔

申禁滯獄詔

以蘇瓌劉幽求配享睿宗廟庭詔

以桓彥範等配享中宗廟庭詔

慮囚詔

欽定全唐文卷二十七

元宗 八

減膳省刑詔

司牧生人愛之如子。睽茲災旱，倍切憂勤。將理政不明，邪
冤囚有滯，邪癘疵道長，邪陰陽氣隔，邪何崇朝密雲布未
洽也。載加寅畏，弗敢荒寧。誠不動天，歎深罪已。思從避減
以塞愆尤，俾月離有期，星退何遠。朕今避正殿，減常膳，仍
令諸司長官各言時政得失，以輔朕之不逮。天下見禁囚
徒中，或以痛自誣者，各令長官審加詳覆，疑有冤濫，隨事

金匱要略卷之二十一
案理仍告於社稷備展誠祈諸州旱處有山川能興雲致
雨者亦委州縣官長速加禱祀

命宰臣省察囚徒詔

惟刑恤哉古之道也朕撫臨四海茂育兆人思致淳風登
之壽域期畫冠而不犯故開羅而在宥念茲下愚自抵常
法時屬盛夏其養生在物最靈惟人爲貴朕處臺榭猶
有鬱蒸之毒彼居囹圄能無惜怛之憂故令宰臣備加案
察省覽所奏用憫於懷爰矜可恕之罪必務惟輕之義將
布寬惠俾從原減應合書罪者宜遞降一等論

整飭吏治詔

每年十月委當道按察使較量理行殿最從第一等至五等奏聞較考仍使吏部長官總詳覆諸州亦比類定爲五等奏聞上等爲最下等爲殿中間三等以次定優劣改轉日憑爲升降縣令每年選舉人內準前條訪擇補置在任有術一任申使狀有兩請兼戶口復業帶上考者選日優與內官其使狀有一請兼帶上考者滿日不限選數聽集優與處分刺史第一等量與京官若要在州未可除改者紫微黃門簡勘聞奏當加優賞京官不曾任州縣官者不

得擬爲臺省官吏部銓選委任尤重比雖守職務在循常
既限之以選勞或失之於求事選日拔擢一二千人不須
限以資次必須究其聲實不得妄相汲引自古鄉舉里選
實課人之淑慝其明經進士擢第者每年委州長官訪察
行業修謹書判可觀者三選聽集并諸色選人者若有鄉
閭無景行及書判全弱選數縱深亦不在選限崇化致理
必在得人獎善勸能義資師古皆有煩濫未聞釐革循名
責實其道不行爲人擇官人蠹猶在既復政理不可因循
須加簡勘以正頽弊

緩征詔

古之爲國者藏之於人百姓不足君孰與足比者山東邑郡歷年不稔朕爲之父母欲安黎庶恤彼貧弊拯其流亡靜而思之非不勤矣今者風雨咸若京坻可望若貸糧地稅庸調正租一時併徵必無辦法河北諸州宜委州縣長官勘責灼然不能支濟者稅租且於本州納餘不須徵却待至春中更別處分有貸糧迴簿等亦量事減徵

求言詔

朕以薄德祇膺睿圖曾不能虛已淳源勵精至道將致俗

於仁壽思納人於軌訓幸乾坤交泰風雨咸若中外百寮
盡知戒懼華夏萬姓頗亦歡康猶恐人或未安政有不愜
令外司置匭側門進狀封章論事靡所不達軒階進規於
何不盡曾無忤旨之罰實有推心之期豈朕之不誠何人
則未諭如聞朝廷之內噂喅紛然進不昌言退多訕議懸
書以謗國僑之患鄧析僞言而辨孔子之誅少正自昔爲
蠹罔不在茲求於理政固宜懲絕自今已後制勅有不便
於時及除授有不稱於職或內懷姦忒外損公私並聽進
狀具陳得失五品已上官乃許其廷爭若輕肆口語潛行

誹謗委御史大夫已下嚴加察訪狀涉疑似推勘奏聞

降大理繫囚罪詔

朕祇膺鴻圖嗣守丕業何曾不馭朽增惕納隍在慮六合之內每勤底綏五刑之屬尤用欽慎然簡書多室惕之訟園扉有幽滯之人淹恤逾時羈縲相對頗異哀矜之義實慚恢踈之網雖刑政之典彼則自貽而在予之責終以多愧其大理禁囚前令詳覆者宜按所犯輕者並放重降一等仍依令式處分

征越舊詔

欽定全唐文

卷二十七

元宗

越雋之地髣羗犯邊孤我大恩敢爲小寇雖螳螂舉斧自
開屠滅之辰而蜂蠆有毒仍藉討除之勢右騎衛將軍員
外置同正員李元通負衛霍之才蘊孫吳之法決勝千里
成誦在心通知四夷若指諸掌故能聞敵思勇好謀而成
宜發戎瀘夔巴梁鳳等州羗兵三萬人馬二千匹并舊屯
兵士赴州討擊賊縱退散亦須窮其巢穴杜絕飛走使無
遺類在此舉焉

命李全確往淮南授捕虎法詔

如聞江淮南諸州大蟲殺人村野百姓頗廢生業行路之

人常遭死失州縣不以爲事遂令猛獸滋多泗州漣水縣令李全確前任宣州秋浦縣令界內先多此獸全確作法遮捕掃除略盡迄今人得夜行百姓實賴其力宜令全確馳驛往淮南大蟲爲害州縣指授其教與州縣長官同除其害緣官路兩邊去道各十步草木常令芟伐使行人往來得以防備

誅長孫昕等詔

夫爲令者自近而及遠刑罰者先親而後疎長孫昕楊仙玉等憑持威屬恣行凶險輕侮常憲損辱大臣情特難容

故令斬決今羣官等累陳表疏故有陳請以陽和之節非
肅殺之時援引古今詞義深懇朕志雖從諫情亦惜法宜
寬異門之罰從聽枯木之斃即宜決殺以謝百寮

禁僭用服色詔

彰施服色分別貴賤苟容僭濫有乖儀式如聞內外官絕
無著碧者皆詐著綠以爲常事又軍將在陣賞借緋紫本
是從戎缺胯之服一得以後遂別著長袍遞相倣倣又入
蕃使等別勅借緋紫者使回合停或有便著曾無愧恥憲
司不能舉劾遂令此弊滋甚自今已後衙內宜專定殿中

侍御史本司官長並量事貶降

更定滿考日例詔

選人既多比銓注過謝了皆不及考遂使每一年選人即虛破一年在於公私俱不便利自今已後官人初上年宜聽通計年終已來滿二百日許其成考仍進遷考例至來年考時併較永爲常式

答倪若水詔

朕先使人取少雜鳥其使不識朕意採鳥稍多卿具奏其事辭誠忠懇深稱朕意卿達識周材義方敬直故輟網轄

之重委以方面之權果能閑邪存誠守節彌固骨鯁忠烈
遇事無隱言念忠讜深用嘉慰使人朕已量事決罰禽鳥
並令放訖今賜卿物四十段用答至言

捕蝗詔

今年蝗蟲暴起乃是孽生所繇官司不早除遏任蟲成長
間食田苗不恤人災自爲身計向若信其拘忌不有指麾
則山東田苗掃地俱盡使人等至彼催督其中猶有推託
以此當委官員責實若有勤勞用命保護田苗須有褒貶
以明得失前後使人等審定功過各具所繇州縣長官等

姓名聞此蟲若不盡除今年還更生子委使人分州縣會計勿使遺類

令御史檢察差科詔

關中田苗令正成熟若不收刈便恐飄零緣頓差科時日尚遠宜令併功收拾不得妄有科喚致妨農業仍令左右御史檢察奏聞

勸獎縣令詔

撫字之道在於縣令不許出使多不得上考每年選補皆不就此官若不優矜何以勸獎其縣令在任戶口增益界

內豐稔清勤著稱賦役均平者先與上考不在當州考額之限也

賜盧懷慎家帛粟詔

故銀青光祿大夫檢校黃門監上柱國漁陽縣開國伯贈
荊州都督盧懷慎衣冠重望廊廟周材訐謨當三傑之一
學行總四科之二等平勃之輔漢同季文之相魯質隣於
古儉實可師雖清白燕翼簞金非寶然妻孥貧窶擔石屢
空言念平昔彌深軫悼宜恤凌統之孤用旌晏嬰之德可
賜其家物一百段米粟二百石

更定兩畿縣令考滿詔

比來兩畿縣令經一兩考即改其行苟且罕在政要百姓弊於迎送典吏因而隱欺自今以後皆令四考滿滿日聽依京官例選仍不得輒續於前勞

簡察驛路妄索供給詔

如聞兩京間驛家緣使命極繁其中多有妄索供給宜令御史劉昇往南北兩路簡察隨事奏聞

命柳城復置營州詔

朕聞舞干戚者所以懷荒遠固城池者所以款戎夷國家

往有營州茲爲虜障此北狄不敢窺覘東藩由其輯睦者久矣自趙文翽失於鎮靜部落因此攜離頗見負塗之睽旋聞改邑之歎高墉填塹故里爲墟言念於此每思開復奚饒樂郡王李大酺賜婚來朝已納呼韓之拜契丹松漠郡王李失活遣子入侍彌嘉柁侯之節咸申懇請朕所難違宜恢遠圖用光舊業其營州都督府宜依舊於柳州置管內州縣鎮戍等並準舊額太子詹事姜師度貝州刺史宋慶禮左饒衛大將軍兼營田都督邵宏鄭州刺史劉嘉言屯田員外郎游子騫等並貞以幹事恪勤在公爰精衆

官之選任以一方之役師度可充管田支度及修築使游
子騫爲副宏可兼充燕郡經略鎮副使仍兼知修築使事
應須人夫糧等一物已上依別勅處分有司仍速支配師
度等並馳驛發遣

遣使巡察河南北詔

伊昔明王奉若天道所寶惟穀所使惟賢故能務穡勸農
興利除害朕以薄德纂承洪緒政期克己誠不動天頃歲
河南河北諸州蝗蟲爲患雖當道遣使除瘞恐今又生育
天戒若此朕甚懼焉罪實在予殃豈移歲且牧宰之任朝

廷所委苟得良材式敷惠訓古有壽張飛逝中牟不入者
斯其效也刺史縣令等當各竭乃心用攘厥患方考休咎
大明黜陟惟爾凡百可不勉哉宜令戶部郎中蔡容往河
北道侍御史崔喬往河南道觀察風俗問利害便與州縣
籌度隨事處置還日奏聞

徵隱士盧鴻一詔

朕以寡薄忝膺大位嘗恨元風久替淳化未昇每用翹想
遺賢冀聞上皇之訓以卿黃中通理鉤深詣微窮太一之
道踐中庸之德確乎高尚足侔古人故比下徵書佇諧善

績而每輒託辭拒違不至使朕虚心引領於今數年雖得素履幽人之貞而失考父滋恭之命豈朝廷之政與生殊趨耶將縱欲山林往而不能返乎禮有大倫君臣之義不可廢也今城闕密邇不足爲勞便勅齋束帛之貺重宣斯旨想有以翻然易節副朕意焉

戒諭吏部員外郎褚璆等詔

朕居萬人之上以百姓爲心常恐有冤不申有理見滯憂勤庶績宵旰興懷且六官分事四方取則尚書郎皆是妙選須稱其職焉可尸祿悠悠曾無決斷昨者試令詢問遂

有如此稽逋動即經年是何道理至如行判程限素編令
式今便準法科責乃是尋常但爲積習寬疎欲得申明告
諭自今已後各宜懲革若有犯者別當處分

量減鎮兵年限詔

王者制五服綏四方申畫郊畿慎固封守是乃選徒興役
禦寇備邊欽若前載率繇茲道朕以薄德紹膺丕運奉天
明命爲人父母永隔綏養鑿寐以之每念征戍良可矜者
其有涉河渡磧冒險乘危多歷年所遠辭親愛壯齡應募
華首未歸眷此勞止期於折衷但磧西諸鎮道阻且長數

有替易難於煩擾其鎮兵宜以四年爲限散之州縣務取
富戶丁多差遣後量免戶納雜科稅其諸軍鎮兵近日遞
加年限者各依舊以三年二年爲限仍不得延留其情願
留鎮者即稍加賜物得代願往聽令復行爲貴勞逸且均
公私咸適宣布遐邇識朕意焉

封永樂縣主出降松漠郡王詔

故東平王外孫正議大夫復州司馬楊元嗣第七女譽叶
才明體光柔順葭苳懿感敦睦有倫舜華靡頹德容兼茂
屬賢王慕義於以賜親納采問名茲焉迨吉宜外館之

寵俾耀邊城之地可封永樂縣主出降契丹松漠郡王李
失活婚之夜遣諸親高品及兩蕃太守領觀花燭

改明堂爲乾元殿詔

古之操皇綱執大象者何嘗不上稽天道下順人極或變
通以隨時爰損益以成務且衢室創制度堂以筵因之以
禮神是光孝德用之以布政蓋稱視朝先王所以厚人倫
感天地者也少陽有位上帝斯歆此則神貴於不黷禮殷
於至敬今之明堂俯隣宮掖比之嚴祀有異肅恭苟非憲
章將何軌物由是禮官博士公卿大夫廣參羣議欽若前

古宜存路寢之式用罷辟雍之號可改爲乾元殿每臨御宜依正殿禮

安置降蕃詔

分命督將保寧疆場且變無知之俗長爲不叛之臣必也仁明在乎清整若脂膏不潤豪髮無欺開懷納戎張袖延狄彼當愛官吏猶父母安國家如天地欲其亡散庸可得乎若其心不公所視唯利放縱部曲阿容子弟此乃求鷹鷄以馴乳使豺狼以掌牧欲其輯寧庸可得也往年趙文翽在營府總統乖方近日張知運在單于徵調失所遂令

東胡喪亂北虜披猖爰構征戍之勤頗致瘡痍之酷言念
於此可爲深戒今諸蕃歸降色類非一在蕃者則漢官押
領入附者或邊陲安置風俗未通言語不達至於蓄養實
務綏懷宜令所在軍州牧將等倍加存恤申其冤盡其理
問疾苦知饑寒公私不得有侵巨細必令無擾儻處馭多
僻恩威不孚龜玉之毀典刑斯及御史出入仍訪察以聞

令奏事仍進先狀詔

君臣之間不當有隱敷納之事必在無私比年百司及諸
使奏陳皆侍仗下頗乖公道須有革正自今已後非灼然

祕密不合彰露者並令封狀奏如文書浩大事理交雜者仍進先狀其史官自依舊例

優禮諸州鄉貢明經進士詔

古有賓獻之禮登於天府揚於王庭重學尊儒興賢造士故能美風俗成教化蓋先王之所繇焉朕以寡德欽若前政思與大夫羣士復臻於理故他日訪道有時忘食乙夜觀書宵分不寐悟專經之義篤知學史之文繁永懷覃思有足尚者不示褒崇孰云獎勸其諸州鄉貢明經進士見訖宜令引就國子監謁先師學官爲之開講質問疑義仍

金定全月五
卷二十一
三
令所司優厚設食兩館及監府得舉人亦準此其日朝請
官五品以上及朝集使往觀禮即爲常式易曰學以聚之
問以辯之詩云如切如磋如琢如磨此朕所望於賢才矣

命越王貞從孫琳嗣爵詔

九族以親克敦其教百代必祀允章厥德故蔡州刺史越
王貞執心不回臨事能斷粵自藩國勤於王家光宅之後
寶圖將缺懷劉章之輔漢追鄭武之翊周遂能奮不顧身
率先倡義雖英謀未克而忠節居多嗣絕國除年踰一紀
奠享淪廢朕甚憫焉夫存或高功歿有明祀數屯則安衆

罹禍時泰則城陽紹封永言興繼式備典冊其封貞從孫
故許王男左監門衛將軍員外置同正員夔國公琳爲嗣
越王以奉其祀

令禮官條奏應行事詔

王者欽若天道率繇時令考六官之法修五紀之化故得
災害不生休徵洊委朕紹膺洪業於茲六載每惇政理思
致和平而陰陽未調蝗水仍集天之垂誠朕甚懼焉夫正
月東郊祈春賞士孟冬北陸迎寒恤孤參四序之運行稽
五材之動用弗協所尚或罹於咎且事必師古禮重執文

將命有司允迪厥訓自今已後每吉月禮官條奏所行事當斟酌古典用孚於休宣布朝廷使知朕意

定致仕官俸詔

養老乞言人惟求舊尊儒尚齒風化攸先其致仕官所請物宜令所司專定一官勾當送至宅

整飭民風詔

堯屋可封孔門無倨此由淳風彼洽德教宏之在人職歸所屬如聞輦轂之下閭閻之內口無擇言行不近禮則失長幼之序豈儀刑之政宜令府縣長官左右金吾明加訓

導捉搦若有犯者隨事科繩

禁屠殺馬牛驢詔

自古見其生不食其肉資其力必報其功馬牛驢皆能任重致遠濟人使用先有處分不令宰殺如聞比來尚未全斷郡牧之內此弊尤多自今以後非祠祭所須更不得進獻牛馬驢肉其王公以下及天下諸州諸軍宴設及監牧皆不得輒有殺害仍令州縣及監牧使諸軍長官切加禁斷兼委御史隨事糾彈

令詳定宗廟社稷嶽瀆祭典詔

國之大事在祀神之所歆惟敬潔誠而齊精意以享則可
臻介福致休祥深慮有司未副厥旨所緣宗廟社稷嶽瀆
等祭宜令禮官博士斟酌古今務加虔肅合於典禮即詳
定奏聞

放遣括獲婦女詔

別宅安婦先施禁令往年括獲特已寬容何得不悛尚多
此事國有常法宜寘于理方畫一於後刑故三令以先德
俾從輕法以愧其心今所括獲者見任官徵納四季祿前
資準見任自餘諸色並準九品官祿數納粟婦女並放出

掖庭即令京兆尹李朝隱求匹配嫁行之京都作戒天下
敢更犯者一依常格

賜京官等俘獲吐蕃牛馬詔

王者六師必有止殺國之二柄且貴先賞今吐蕃背盟我
軍獻捷執訊獲醜以捨於平人歸馬休牛不資於國用利
以和義思與卿大夫共之其馬及犛牛等並賜京文武五
品已上清官及朝集使三品者所繇節級分與

順時決獄詔

仲春在候膏雨頻流故當法天布和順時行令天下諸繫

金史卷之二十一
三
囚宜令所繇作速䟽理斷決勿有冤滯

禁策判不切事宜詔

我國家敦古質斷浮豔禮樂詩書是宏文德綺羅珠翠深
革弊風必使情見於詞不用言浮於行比來選人試判舉
人對策剖析案牘敷陳奏議多不切事宜廣張華飾何大
雅之不足而小能之是銜自今已後不得更然

久任二千石詔

與我共理惟良二千石久於其政然後化成承前已來頗
多僥倖但因入考即有改轉自今以後非灼然應黜陟者

更無遷易敦此風俗革其苟且又舊例別駕皆是諸親近年以來頗多餘色先授者未能頓輟已後自循舊制去冬有因計入朝不可更令却往過考事了並量事敘用

授潘好禮邠王府長史詔

分命諸王典於大郡諒存公道以鎮淳風邠王稟性頗寬馭下不肅且復簡貴未詳倫理故選剛直任之端寮王家奴客等有違法網者長史潘好禮隨事檢校科決若王有訶怪仰好禮具狀聞徹

授盧鴻一諫議大夫詔

嵩山隱士盧鴻一應辟而至訪之至道有會淳風爰舉逸
人用勸天下特宜與五品官授諫議大夫

賑恤河南北詔

德惟善政政在養人必將厚生阜俗利物宏義朕奉若天
命嗣膺王業思一物失所以百姓爲心間者河北河南頗
非善熟人間糧食固應乏少頃雖分遣使臣已令巡問猶
恐鰥獨不能自存凡立義倉用爲歲備今舊穀向沒新穀
未登蠶月務殷田家作苦不有惠恤其何以安宜開彼倉
儲時令貸給況京坻轉積歲月滋壞因而變造爲利宏多

將以散滯收贏理財均施所司合作條件俾便公私

申禁滯獄詔

六卿分設諸郡咸理在於下人合免冤滯如聞越局侵務
背公向私其傷則多爲政必紊宜令天下州縣百司寮案
俱守乃曹各勤所職或有身名尚屈刑罰不平職役未均
徵差無次爰及侵奪亦兼違負凡人所訴大略如斯若縣
不爲申州必須理州不能理省必爲裁上下相持冤訟可
息自今已後訴事人等先經縣及州並尚書省披理若所
繇延滯不爲斷決委御史採訪奏聞長官已下節級量貶

以蘇瓌劉幽求配享睿宗廟庭詔

凡有功者銘書於王之太常祭於大烝司勳詔之允所謂
疇庸紀勞頒賞旌善藏於天府享於廟庭臣哉隣哉其道
光也故尚書左僕射太子少傅贈司空荊州大都督許文
貞公瓌閑邪存誠允迪厥德故尚書右丞相太子少保郴
州刺史徐國公幽求聞義盡節克茂乃勲並儀刑羣后左
右厥辟直道罔缺危言孔臧景雲末年邦國多難愷悌君
子服勞王家或親受顧託以安劉氏或潛圖翼贊願奉唐
侯績乃舊服協於先契宏濟弼亮厥猷茂焉俾台小子嗣

守文武之業獲奉宗廟之靈實資元輔是敷末命茲予大
享于先王爾祖其從祀以配我有唐之休烈並可配享睿
宗大聖貞皇帝廟庭

以桓彥範等配享中宗廟庭詔

皇輿肇建必有輔佐之臣天步多艱爰仗經綸之業故侍
中譙國公桓彥範侍中平陽郡公敬暉中書令兼吏部尚
書漢陽郡公張柬之特進博陵郡公崔元暉中書令南陽
郡公袁恕己等並德惟神降材與運生道協台嶽名書識
緯寅亮帝載勤勞王家參復禹之元謀奉昇唐之景命雖

殂謝既久而勲烈益彰撫彝鼎以念功想旂常而增感緬
遵故實用表徽懿俾列在清廟登於明堂克申從祀之儀
式茂疇庸之典並可配享中宗孝和皇帝廟庭

慮囚詔

皇天應人必有所謂此月少雨蓋非徒然深慮繫囚或有
冤滯京城內諸司見禁囚徒並以來日過朕將親慮所司
量準舊典其杖以下情不可恕者速決自餘即放却